



Broj: 06-04-24618-53/23  
Sarajevo, 13.07.2023.godine

**SKUPŠTINA KANTONA SARAJEVO**  
**-OVDJE-**

**Predmet:** Izjašnjenje na zastupničku inicijativu zastupnica Admela Hodžić, dostavlja se

Zastupnica Admela Hodžić je dana 16.06.2023. godine uputila zastupničku inicijativu, koja glasi: "Na osnovu čl. 106. i 213. Poslovnika Skupštine Kantona Sarajevo ("Službene novine Kantona Sarajevo", br. 41/12- Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22 i 17/22-Ispravka) podnosim inicijativu Vladi Kantona Sarajevo i Ministarstvu za boračka pitanja Kantona Sarajevo da u što skorije vrijeme poduzmu sve potrebne aktivnosti i obezbijede sve potrebne uslove kako bi se usvojio Prijedlog izmjene i dopune Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", broj 31/22) a koje se odnose na sljedeće:

**POGLAVLJE I – OSNOVNE ODREDBE**

**Stavu (1) člana 1. iza pojma "demobiliziranih branioca" dodaje se "i članova porodica umrlih demobiliziranih boraca".**

**Stav (1) Člana 1. mijenja se i glasi:**  
**(Osnovne odredbe i korisnici dopunskih prava)**

Dodaje se novi stav (4) koji glasi:

(1) Ovim zakonom uređuju se prava, uvjeti i postupak za ostvarivanje prava, korištenje i prestanak prava, sredstva za finansiranje prava, kao i druga pitanja od značaja za ostvarivanje prava članova porodica šehida, članova porodica poginulih, umrlih i nestalih branioca, ratnih vojnih invalida i članova njihovih porodica, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, branioca, demobiliziranih branioca i **članova porodica umrlih demobiliziranih boraca**, dobrovoljaca, organizatora otpora, veterana i ratnih vojnih zarobljenika, kao lica zaslužnih u odbrambeno – oslobodilačkom ratu sa područja Kantona Sarajevo (u daljnjem tekstu: Kanton), kao i mirnodopskih vojnih invalida.

**Stavu (5) Člana 2. iza riječi "porodica" koja se nalazi na kraju ovog stava dodaje "i članova porodica umrlih demobiliziranih boraca.**

## Član 2. mijenja se i glasi: (Definiranje pojmova)

(1) Pod pojmom:

- a) porodica šehida i porodica poginulog, umrlog, nestalog branioca,
- b) branilac,
- c) dobrovoljac i organizator otpora,
- d) veteran,
- e) demobilizirani branioc,
- f) ratni vojni invalid,
- g) mirnodopski vojni invalid.

smatraju se lica koja su definirana čl. 2, 3. i 4. Zakona o pravima branilaca i članova njihovih porodica.

(2) Pod pojmom članova porodice šehida i porodica poginulog, umrlog, nestalog branioca i umrlog ratnog vojnog invalida smatraju se lica definirana članom 17. federalnog zakona. Djeca šehida, poginulih, umrlih i nestalih branioca (u daljnjem tekstu: djeca šehida i poginulih branioca), rođena u braku ili u vanbračnoj zajednici i nakon prestanka prava na porodičnu invalidninu imaju status člana porodice poginulog branioca.

(3) Pod pojmom dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja smatraju se lica koja su definirana čl. 1. i 2. Zakona o posebnim pravima dobitnika ratnih priznanja i odlikovanja i članova njihovih porodica.

(4) Pod pojmom ratni vojni zarobljenik smatra se branilac koji je vršeći vojnu dužnost zarobljen od strane agresora na Republiku Bosnu i Hercegovinu.

(5) Pod pojmom demobilizirani branioc i članovi porodice demobiliziranog branioca smatraju se lica definirana čl. 2. i 3. Zakona o pravima demobiliziranih branilaca i članova njihovih porodica i **članova porodica umrlih demobiliziranih boraca.**

(6) Pod pojmom zajedničko domaćinstvo smatra se zajednica stanovanja, privređivanja i trošenja ostvarenih prihoda.

### Obrazloženje

Svjedoci smo uloge i značaja boraca Armije Republike Bosne i Hercegovine u odbrani jedine nam domovine Bosne i Hercegovine. Borce Armije RBiH koji su poslije rata demobilizirani također nose iste ratne zasluge i priznanja kao šehidi i šehidske porodice kao i preminuli borci tokom agresije na BiH. Porodice šehida i porodice poginulih, umrlih nestalih branioca i umrlih ratnih vojnih invalida, dobitnika ratnih priznanja i odlikovanja i članova porodica poginulih, umrlih i nestalih dobitnika ratnih priznanja i odlikovanja i članovi njihovih porodica, sve ove porodice su naslijedile prava nakon smrti pripadnika Armije RBiH dok porodice preminulih demobiliziranih boraca gube sva prava nakon njihove smrti. Preminuli demobilizirani borci su uglavnom tokom agresije pretrpjeli određene ratne neadekvatnosti koje su u znatnoj mjeri narušile njihovo zdravlje zbog čega su u zemunicama teško oboljeli, bez dovoljno hrane i lijekova i promrzli Bog zna koliko puta, nakon čega su mnogi nažalost preminuli veoma mladi a iza njih su ostale supruge i maloljetna djeca koji su nakon njihove smrti izgubili sva prava na korištenje bilo kakve pomoći na ime dopunskih prava boraca/branitelja. Briga za ječme/siročad bi nam trebala biti na prvom mjestu. Ta djeca nemaju roditelje kao ni djeca šehida i poginulih boraca/branitelja Armije RbiH a isto tako su i

njihovi roditelji zaslužni za odbranu naše zemlje kao i članovi porodica koji nakon smrti boraca koji su preminuli u ratu koriste ta prava.

Smatram da na neki način moramo vratiti suprugama i djeci demobiliziranih preminulih boraca osnovna prava iz Zakona o dopunskim pravima boraca-branitelja Bosne i Hercegovine i pobrinuti se da im se na neki način nadomjestimo pomoć i podršku koju bi svakako imali da su njihovi očevi i majke koji su bili učesnici u odbrani naše zemlje živi.

Ispravno, ljudski i humano bi bilo da nakon smrti člana porodice demobiliziranih boraca članovi njihovih porodica naslijede njihova prava, odnosno da im se ta prava ne uskraćuju samo iz razloga što njihovi najbliži nisu preminuli u ratu nego poslije rata.

Obzirom da Zakon o dopunskim pravima boraca-branitelja Bosne i Hercegovine ("Službene novine Kantona Sarajevo", broj 31/22) kao i izmjene i dopune istog, govori i obrađuje pitanja koja su u nadležnosti Kantona Sarajevo, iz tog razloga se obraćam Vladi Kantona Sarajevo i nadležnom ministarstvu.

Smatram da bi bilo neophodno usvojiti ove predložene izmjene i omogućiti prava iz ovog Zakona porodicama preminulih demobiliziranih boraca/branitelja jer za realizaciju ove inicijative nisu potrebna dodatna sredstva zbog toga što se ta ista prava nasljeđuju i prelaze na članove njihovih porodica nakon njihove smrti.

Molim nadležne da što prije pristupe realizaciji ove inicijative u korist porodica demobiliziranih preminulih boraca Armije RBiH.

Na pokrenutu zastupničku Inicijativu dajemo slijedeće

## I Z J A Š N J E N J E

Ministarstvo za boračka pitanja Kantona Sarajevo (u daljnjem tekstu: Ministarstvo) vrši upravne i stručne poslove utvrđene Ustavom, zakonom i drugim propisima u oblasti ostvarivanja prava članova porodica šehida, članova porodica poginulih, umrlih i nestalih branioca, ratnih vojnih invalida i članova njihovih porodica, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, demobiliziranih branioca, dobrovoljaca, organizatora otpora, veterana, ratnih vojnih zarobljenika i lica koja su kao maloljetna stupila u Oružane snage R BiH, kao lica zaslužnih u odbrambeno-oslobodilačkom ratu sa područja Kantona Sarajevo, kao i vođenje i podržavanje aktivnosti na očuvanju tekovina odbrambeno-oslobodilačkog rata 1992-1995. godine, održavanju manifestacija i drugih sličnih projekata.

Zakonom o pravima demobiliziranih branilaca i članova njihovih porodica ("Službene novine Federacije BiH", br. 54/19 i 29/22) uređena su prava, uslovi i postupak za ostvarivanje prava demobiliziranih branilaca i članova njihovih porodica. Članom 2. navedenog Zakona uređena je definicija demobiliziranog branioca, a članom 3. propisano je da su članovi porodice demobiliziranog branioca u smislu tog Zakona roditelji, bračni partner i djeca koja žive u zajedničkom domaćinstvu sa demobiliziranim braniocem, kao i da se pod djetetom demobiliziranog branioca u smislu tog Zakona smatra dijete rođeno u braku ili van braka, usvojenik ili pastork demobiliziranog branioca.

Odredbama Zakona o dopunskim pravima boraca-branitelja Bosne i Hercegovine ("Službene novine Kantona Sarajevo", broj 31/22) (u daljnjem tekstu: Zakon) definisana su dopunska prava i uvjeti za ostvarivanje prava. Članom 74. Zakona propisan je prestanak prava po ovom Zakonu i uvjeti za nastavak njihovog korištenja. Prestanak statusa boraca-branitelja BiH, ratnog vojnog invalida ili člana šehidske porodice-porodice poginulog borca i porodice umrlog



ratnog vojnog invalida u skladu s važećim Federalnim propisima povlači i prestanak prava po tom Zakonu.

Članom 73. istog Zakona definisano je korištenje prava po tom Zakonu na način da se ova prava mogu koristiti dok postoje za to propisani uvjeti i da se ne mogu nasljeđivati, niti prenositi na druga lica. Ukoliko je borac-branitelj BiH i ratni vojni invalid prije svoje smrti započeo proceduru ostvarivanja nekog od prava iz ovog Zakona, članovi njegove porodice, a kako je propisano ovim članom mogu nastaviti postupak, do realizacije ostvarivanja započetog prava.

Jedini izuzetak od navedenog, odnosi se na supruge umrlog demobiliziranog branioca pri ostvarivanju prava na novčanu egzistencijalnu naknadu pod određenim uvjetima shodno odredbama člana 19. Zakona o pravima demobiliziranih branilaca i članova njihovih porodica ("Službene novine Federacije BiH", br. 54/19 i 29/22).

Iz naprijed navedenog isključimo da ovo Ministarstvo slijedi federalne propise, odnosno Zakon o pravima demobiliziranih branilaca i članova njihovih porodica ("Službene novine Federacije BiH", br. 54/19 i 29/22) te ukoliko na federalnom nivou budu proširena prava ove boračke kategorije - članova porodica umrlih demobiliziranih branilaca, tada će ti izuzeci biti definisani kroz izmjene i dopune Zakona o dopunskim pravima boraca-branitelja Bosne i Hercegovine.

S poštovanjem,

Dostaviti:

- ☉Predsjedavajućem Skupštine Kantona Sarajevo,
- Zamjenici predsjedavajućeg Skupštine Kantona Sarajevo x3,
- Službi za Skupštinske poslove Kantona Sarajevo,
- Stručnoj službi Vlade Kantona Sarajevo,
- A/a.



**Dr.sc. Omer Osmanović**